

晚

晴

移

詩

匯

晚晴移詩匯卷九十七目錄

汪縉 十四首

趙曦明 三首

梁玉繩 七首

余蕭客 一首

施國祁 二首

賈田祖 八首

魏之琇 十首

符之恆 二首

查景 三首

吳均 三首

余京 八首

喬億 六首

石鈞 六首

疏枝春 四首

方正樹 十二首

羅聘 二首

方薰 五首

蔣仁 三首

奚岡 四首

朱方藹 九首

鮑倚雲 三首

於震 三首

晚晴簃詩匯卷九十七

徐世昌

汪縉字大紳號愛廬吳縣人諸生有二耕草堂集

詩話愛廬借彭尺木講學溝通儒釋其所著文錄二錄三錄博大精深有非尺木所能及者詩初宗少陵晚多悟境又近寒山拾得

夏日閒居雜詠

吳趨盛豪華閭門最繁劇每苦炎夏蒸煙火萬家窄曰余在戊辰會此設講席明晤闐闐間名利共物役本性愛蕭疎時欲蠟幽屐賴有羽人家相望在咫尺地古卻炎暉仙居世氛隔幡高引遠颺下有對奕客予心已欣然藉草坐壇石

日色川上媚煙光草際重橫塘夾修竹十里蟬聲中我來

古渡頭歲月多行蹤行蹤一何多言瞻墓上松墓在塘之  
西家住塘之東時節須祭掃悠悠一水通秋林靜虛白春  
山靄空濛氣候良自佳泛舟每從容炎夏少經過安知野  
趣濃野趣濃如此欣賞情何窮

浣香洞

幽溪穿曲竇洞口樹成帷垂陰生晚吹散幘坐苔磯雨過  
月稍上光含萬籟希天水空明裏菡萏相因依香氣自白  
晝夜來靜入微起心欲往求已覺前境非卽此悟禪寂釋  
我胸中機

丙子歲初出門見有短衣揖讓者繼凶年之後得此  
感而有作

去歲眞彫瘵東南氣尙新春從江岸轉禮到販夫眞揖讓

看閭里詩書慕搢紳撫綬煩大吏風俗不難淳

每從凶歲後恩澤人人深俯仰蒼生事飢寒聖主心截糧  
留水次分食到桑林爲國勤休煥須知玉步臨

江南財賦重輸灌仗年豐縱使朦朧集應憐杼柚空張陳  
留惠政周况有遺風報國無多事長憂百姓窮

題王存素畫黃山雲海障子

昔逢海客談瀛洲蒼茫氣象無能侔我欲向之問端倪但  
指天際雲悠悠卽雲卽海空外流今看好手弄狡獪滿紙  
淋漓吁可怪不知墨氣并雲氣唯見紫瀾萬疊聲澎湃卽  
海卽雲壁上挂我聞黃山之雲天下奇仙靈變幻那得知  
欲往觀之勞我思異境恍惚移於斯一縷初生上遙漢煙  
交霧集漸浩瀚雲作奇峯峯作雲雲峯片片相凌亂俄然

南北東西合浮天沒地無邊岸三千白月照難窮九萬長  
風吹不散神仙欲到輒引去河伯無端望洋歎雲邪海邪  
誰能判咫尺相從游汗漫乃是三十六峯入臂腕掃卻一  
片錦繡段非海非雲任君看畫理通化工對之開心胸我  
將陋木華之海賦隘屈子之雲中契達觀於漆園等妙諦  
於大雄天地溟滓古今混同何有乎日月之循環宇宙之  
始終而況人世之得失窮通一一歸虛空精靈忽與丹青  
聚置身已在天都峯囊括千朵萬朵之芙蓉割取千間萬  
間之琳宮踏倒千年萬年之長松誓從王夫子游戲入無  
窮

中峯讀書

借來客舍是禪居愛坐閒窗夜色虛澗水時聞風斷後竹

林漸白月生初難從支遁親調鶴且學天隨晚著書心地  
喜無元字腳何妨門外問三車

懷古

關中

四海嗷嗷萬姓荒只供一炬燕阿房賈生從此傳三論秦  
帝空矜畢六王西去天連蜀棧迴東來地接雒川長但教  
莽莽看形勝據此金湯那得亡

武昌

大江東去路漫漫孰向煙波老釣竿三國戰爭年最少一  
家豪傑古來難指困意氣迎諸葛顧曲風流走阿瞞從使  
稱臣頻上表依然半壁擬龍蟠

野僧

直入山中去山中別有天把茅黃葉路洗菜白雲泉山月  
照初定松風吹早眠此心無處住隨處好安禪

題李空同集後

愛國忠君千首詩知君眞把少陵師渡河擘海尋常事妒  
殺江南錢受之

羅臺山道吳歸里允初送至昆陵作詩贈別臺山次  
韻答之因繼作二首

有客乘風去煩君寄語歸把書猶對坐二妙實同機江草  
煙薰岸蹊梅月帶扉夢魂通異地怕我用心非  
流浪轉增劇吾生何處歸慣喧南郭籟難息漢陰機雲懶  
終依岫風勤偶掩扉交情同脈脈肯爲辨今非

趙曦明字敬夫江陰人諸生有中隱集



詩話敬夫博覽強識佐盧抱經校勘羣籍世稱精審  
所著顏氏家訓注卽附刊叢書中詩樸質不事雕琢  
學人之作

### 安遇

一日不盡分此日爲虛生一事不盡分此事爲無成順逆  
常變中努力得安行我生自有定寵辱何須驚

### 詠懷

少年愛求友中年愛閉關於今老將至空谷萬慮刪直諒  
與多聞古道不可攀人謾我所惡諛人我復慳交諛如質  
易無益且成患譬舍松桂林跣足走荆菅與其悔而晚何  
如未悔間忽感求聲鳥孤雲看往還

### 續溪道中

五日入續溪風景始可喜溪流一縷通雲氣千巖起當面

立危壁竹木紛如綺根株走龍蛇脈脈復跂跂煙火空際  
生人家深樹裏遠近恣憑眺傍徨不知止夕陽射林表明  
媚更無似欲乞買山錢卜居翫清泚

梁玉繩字曜北號諫庵錢塘人有蛻稟

詩話諫庵高門清蔭負不羈之才朝經夕史孜孜不  
倦與弟處素劇心僕學嘗貽以書略言吾與弟寢跡不  
衡門繼承素業他日得有數十卷書傳於後不至姓  
名湮沒足矣後漢襄陽樊氏顯重當時其子孫雖無  
名德盛位世世作書生門戶吾仰之慕之願與弟共  
勉之其雅志如此諫庵治太史公書為志疑處素亦  
治左氏傳為左通皆哀然成巨帙所願已酬諫庵詩  
雖不多而清迥蒼堅不作當時體亦足稱其所學  
同應叔雅及仲雅丈往毘陵過黃埠墩坐篷頂玩月

小飲

風聲颯颯吹帆檣菰蒲夾岸如人長行盡菰蒲凡幾曲船  
頭船尾明月月光照徹篷窗几驚醒幽人夜半起不坐

舟中坐舟頂恍然身在層霄裏應君軒爽張君豪仰天大笑傾金舳餘瀝還將灑湖水欲把明湖變濁醪是時殘魄沒幽嶺坐久水風侵袂冷萬蛙聲裏一孤舟東方欲白星辰靜

古意寄湯吉甫

故衣未可棄故人未可忘衣故身所便人故情益長自君長安去誰與共翱翔登高望四野煙水蒼茫茫願隨北飛鳥扶搖到君旁君旁不可到風急毛羽傷緇塵三十丈素衣變元裳長安非易居何不歸故鄉

春暮自吳門至松江

欲共春風語輕舟逐鳥飛落花沾酒店芳草釣魚磯平野天邊盡遙山煙外微村童挑薺菜笑趁夕陽歸

忽聽吳歌起歌聲趁軋啞殘潮隨去艇遠樹帶飛鴉幾點  
過雲雨新枝閨月花溪灣將泊處挂網兩三家

讀王穀原比部遺藁

先生讀書萬卷破可憐一字不救餓塊壘惟將杯酒澆孤  
詠幽吟少人和中年奔走向長安長安熱客冷眼看往來  
素心只三四哀歌擊筑相鳴彈久之入直中書省涕長一  
尺衣衾冷旋復對策改郎官不樂文書樂閒靜翻然便賦  
歸去來老屋數間門不開家徒壁立何所有但有及榻青  
青苔憶昔京華暫僑寄我時幼小猶能記頻向牀頭索紙  
筆東塗西抹供游戲悲哉轉瞬幾經秋先生修文歸玉樓  
人間萬事半陳迹如露如電如水漚留傳手藁千番紙身  
後空名惟此耳詩能窮人窮益工自古才人皆若是

得王栗臣孝廉札奉寄

燕北書傳一雁過年華  
每自惜蹉跎塵埃袍草功名薄  
風雨槐花涕淚多  
已是言愁推衛玠  
那逢薦士有常何  
劇憐都講談經處  
歲月相思發浩歌

翠雲草和王栗臣孝廉韻

翦得幽崖一片雲  
雲生芳草翠交紛  
牆陰最好經微雨  
亭角偏宜攬夕曛  
迴匝色連青綺幄  
蒙茸光汎碧羅裙  
海棠蕉樹憑相賞  
非霧非煙澹不分

羣芳譜翠雲草種於虎刺芭蕉海棠之下極佳

余蕭客字仲林號古農吳縣人有選音樓詩拾

詩話古農爲惠松厓弟子經學小學並有淵源所著古經解鈎沈文選音義等書皆爲世重詩格幽秀詠病馬云旋毛腹下一千里死骨人間五百金病蟬云古寺無人送殘暑白門有雨灑斜陽皆雋語

懷任文田

繫艇東溪畔花遲春未殘所思今不見雪霽月生寒

施國祁字非熊號北硯烏程人諸生有禮耕堂集

詩話北硯嗜學工詩古文辭熟於金源一代事實撰金史詳校以其餘纂金源劄記又注遺山詩集旁徵博引尤詳於本事貧爲人設肆鬻棉因名其所居室曰吉貝居詩外清內腴味之彌旨

題胡歐庵詩鈔後

多能天遣秀羸償倦客吟鐙半倚牀靜裏維摩聊示疾憤  
來元晏竟成狂逸民待刻碑頭字迴陌難鈔肘後方扶病  
重尋石湖賦夜深深深禮大醫王

金史詳校成書十卷自序卷端附題於後

閒消我有肆簾風寓墨金源舊事叢野史功臣慚褚補圭  
齋諍友悔劉通書鈔冷局讎難徧字訂譌傳擬未工長此  
一編深篋底敢言載筆附羣公

賈田祖字稻孫號禮耕高郵人諸生有賈稻孫集

雨

殘鐙耿猶照涼氣入虛幌蕭條風雨至颯沓徧空響晨起  
碧柯溼微曦淡初上衡門希來蹤心與孤雲往所思在江  
湖煙蓑釣菰蔣

落葉

夢裏蕭蕭雨驚看月一牀西風吹敗葉半夜響空廊似我  
無依客終年辭故鄉暫謀棲息地狼籍避繁霜

題李北岳先生詩集

十五才人江左出吾郡三分已居一斑斑古色擅宮王六  
籍沈酣鬪奇崛繆公淡宕如春雲暮年刪訂細詩律郭家  
處士何寄欽昇天已入盧仝室

耳官先生就中深厚推魚

川李公一昌黎玉局相差肩不用鈎章與棘句雄神大力

能迴旋綿津於此特珍重壓倒吳會雄詞源美人豈不玉

堂貢耳官失職悲速遭我生桑梓有恭敬況乃泰華森其

顛當時太虛踞山斗裁紅暈碧徒便娟公之音聲協雅頌

謂宜俎豆追四賢誰云寂寞五百載秦王新城詩風流不見

年看摩堅壘搖先鞭濟南文冢已萃律苦欲質證無因緣

秋雲木葉本奇絕老宿再荷尙書憐沈歸愚尙書選國朝

多鴻篇偉製盡登載朗如日月縣瑤編雞林寶貴萬口誦

荆山玉剖珠騰淵淮海維揚古才藪生天慧業公宜先禮

官論定百世祀他時文苑其爭傳

題楊青村先生詩集

青村常州武進人名掄詩載入江表十五子集

我生局束雞甕中可憐蕭索如衰蓬豈惟五岳足未到并



此眼前山水無由逢螢乾蠹死老殘帙何異候蟲時鳥嘯

悲風紀游往往羨康樂神工鬼斧開鴻濛秦州杜老鬪奇

崛實與太白蜀道爭兩雄後來手筆愧凡劣譬以鈍戈朽

甲攻崇墉夜來披點商邱刻鮫人網布珊瑚空秀野草堂

出新意謂顧俠君先生遇佳山水留詩筒淋漓潑墨更誰子橫絕

獨步青村翁齊州九點羅心曾玲瓏雕刻青芙蓉中原蠟

屐迴恩恩蠻天宰邑憑祝融洞庭彭蠡飛艫艫中流絕叫

驚蛟龍萬弩直射馮夷宮綵絲弔屈心忡忡青村有五日渡洞庭詩絕

佳欲呼湘纍歌蘭叢吁嗟乎丈夫薄宦路已窮簿領朱墨

紛相從才雄天末少人識頑煙瘴雨支吟筇江東羣彥坐

臺省鏘鳴玉佩陳鐘鏞我讀君詩悼君遇忽覺清夜劒戟

摩蒼穹急襲瓦鐙煮濁酒爲君感慨抑塞揮千鍾

丙申歲仲夏洪穉存來自毘陵訪予寓齋用王荊公

和王微之登高齋韻奉贈

兼旬不出雙屐埋翻瓢急雨天河筵畢逋朝飛縶其翼萬  
頃瘴墨紛搪挨我家澤國畏淫潦愁城百尺高崔嵬那無  
篇帙供獺祭蠹死不入圖書堆索居誰憐子桑病款關有  
客衝泥來森然奇秀撲我面一談一笑皆快哉憶昨官廨  
始識君不須縞紵惟揮杯手挽強弓穿七札軋霄奇句驚  
九垓穉存詩有憂旱紀事詩數首看君閱世抱孤憤三寸不律含風雷其  
時列郡正枯旱火雲頽赫空天排清秋氣候似九夏瞻卬  
有嘒明星台憂時蟣蝨慢呼籲與君爛醉懷且開香山樂  
府擬屬和讓君主敦去聲吾輿臺雙丸跳擲倏經歲周南復  
此同歡哈濁醪相勸盡今夕安得有酒傾如淮

妃黃儷白十丈埃把君詩卷實壯哉

集存出詩集見示

手披口誦

百紙盡溽暑濯肺清風來斑斕錦繡麗星斗波濤潤澗流

江淮山靈刻劃真宰哭力鬪大謝甯相挨瑰奇閒走昌谷

陣綺豔詎涉齊梁臺

二句摘卷中評語

大都門軻迴自關紛紛皮

相俱堪哈縑囊壓疊齒未壯淵穎欲盡故紙堆方今櫟槍

掃西域捷書蚤晚移三台大凱饒唱君能爲曷不響奏鈞

天雷朱顏綠鬢坐銷蝕鸕鷀苦盡三百杯我髮種種伊可

憐出語有似稊秕從鳴鳴擁鼻五十載欣君鉅製萬卷該

沈香絲管在指日還期姓氏名山鬼昌黎一經定可就子

雲奇字終當排皇皇著作富充棟常常老眼爲君開

雨師弭轡頑雲埋好山一房青鬼鬼扶筇欲邀詩老屐

謂朱

柳陰佳處浮深杯而君白紵先濟勝攀蘿獨企煙霞堆

當年歌停僅餘寺奸雄不足增人哀詩人矯首望江北欲

韓元化施黔雷

稗存存游白紵山望江北詩中備言黃淮水患故云

杞人憂天正

血面巨川何力排黃淮宣房貯腹豈捫籥會借前箸陳鸞

臺方今螳封亟保障萬指補裂春泥從蒼生壯志荷公輩

魚頭之怕曾爲開

自詩人句至此俱綜稗存詩意

兩無其極今亦歇喜遍

孩戲歡黃台江南年穀穩豐熟羈人飽食且樂哉鷦鷯一

枝仗友力曹騰高枕百事排江湖鷗鷺意浩蕩交朋萍梗

感去來與君會面祇一再牽腸遶腹能千迴高文子可泣

神鬼

稗存並以制藝見質

絕叫我欲驚埏垓卽今年哀強自力世上

小兒恣笑哈長篇鼓三亟投贈戰場故壘思廟揆天涯知

己更振觸三千里外無雙才

謂黃仲則

丁酉春日病中留江都汪容甫暨李孝臣王石臞草

堂聚飲翼日容甫北行爲詩以別兼柬孝臣石臞  
苔荒草蔓半畝宮不知戶外春已濃支離一疾肝肺攻要  
腳驚緩成疲癰錐子穎脫心絲空繩牀莫療蒙頭慵汪子  
何來省龍鍾李王聯袂其音楚彌天鑿齒勁敲逢三君雁  
行于且喁坐我琴書之房櫳家貧亦有鰕鮓供相與作達  
鐙燭紅耳官失職悲不聽高談但聞聲淪淪心許不假言  
辭通良覲累日寬塵習已疾捷若盧扁功惜哉驪駒逝恩  
恩我欽汪子靈光崇五三八九經術鴻文鐫金石垂厚穹  
阿誰相厄能兩雄邦江帶水疎吟筇何時下上偕雲龍仗  
君慧業開愚憊可憐蹤迹如飄蓬石臞又放湖千篷將之石梁  
剩我瑟縮吟悲翁知己失散眞路窮出門惘惘迷西東爾  
夔我虻相憐同望君重來鼓絲桐

魏之琇字玉橫號柳洲錢塘人有柳洲遺藁

詩話柳洲少孤貧佐質庫幾二十年晝營所職夜篝  
鐙讀書積學既久豁然貫通家本業醫兼攻先人所  
遺岐黃書亦臻奧窔詩風格高曩先有嶺雲集鮑渚  
飲爲刻行自悔少作復自刪定卒後渚飲又與胡滄  
來項金門  
共爲校刻

感交

陵苕本弱植葳蕤託翹柯春風吹林端蒙寵吐繁華曰余  
幼失所飄轉隨蓬科引蔓值松柏垂陰攀薜蘿煙霞緬煥  
爛雲日思蕩摩欽哉數君子晨夕更切磋白玉幸辭璞精  
金念離沙廊廟雖弗施管絃聊可歌登高一望遠嘯侶何  
其多歲月亦易邁存沒頻興嗟湖山自終古江海無迴波  
逝者旣云已來者將如何

秋懷

萬物皆有盡孤生豈無休冉冉卽遲暮脈脈懷殷憂星霜  
忽已易歲月嗟何邁明河耿遙夜皓魄揚清秋吟蟬露下  
切落葉煙中稠銀缸映戶外錦瑟橫牀頭美人悵何處良  
會知末由來晨不可計去日焉能留掩鏡釋浩歎臨觴激  
清謳遺情以乘化宇宙從悠悠

舟行登觀音巖用太白同人舟行韻

長風天未來吹動海東月挂席凌滄洲揚旌發溟渤迴望  
羅與浮眇然青一髮合沓重山中林巒互出沒崒嶭千仞  
巖橫空豁天骨舍權窮雲根攀躋勢超忽俯視臨滄江逝  
波無時歇便欲乘丹梯振衣入瑤闕

題嚴力庵畫西溪探梅圖

郡城西去三十里萬樹梅花一溪水日出煙銷不見人人

家隱約梅花裏東風幾日吹林薄茅舍板橋春漠漠娟如  
靜女倚修竹瘦若癯仙卧寒壑陂塘寂寂花悄悄清溪彷彿  
桃源深了無塵埃汗履跡時有雁鳴驚挈音天憐此境  
太幽絕特倩我曹爲搜抉載酒晨衝古渡煙尋詩暝踏荒  
林雪輕舟盪晴花正開入花漸深迷路迴月明疎影掠篷  
過風起暗香隨櫂來十年無復經河渚回首同游半今古  
重看水墨意茫然始覺嚴兄用心苦

早春泛舟西湖用遺山泛舟大明湖韻

吳儂不睡西湖水愛此渟泓三十里東風吹船向天上鳬  
雁迎人飛欲起兩隄如帶橫彎彎十二畫橋連玦環紅樓  
翠館天半出倒影浮動煙波間晚來繫櫂西泠渡油碧香  
車松柏路水佩風裳不可要蘭襟柳帶愁煙露孤山梅花



別有情邀我虛亭散餘步夕陽澹澹天悠悠寒渚無人見  
雙鷺沈吟往日林逋仙蹤跡吾宗同仲先草廬入畫已千  
載我來放歌空叩舷箋天願乞煙霞福小住蓬萊五百年

夜泊廬陵

岸險沙痕折江空露氣澄荒雞迎戍鼓宿雁避漁燈客夢  
隨楓落鄉思對月凝秋聲殊可賦此夜泊廬陵

秋霽

伏雨初收意灑然生衣乍試晚風前懷人酒熟燈明候顧  
影桐疎竹冷邊夜景樓臺天倒合秋光城郭月孤懸無端  
忽著東南望獨卧蠻江憶往年

年年

年年樓上盼飛鴻二月春愁滿鏡中芳草綠迷天近遠落

花紅隔水西東未能化石身猶在何處爲雲夢始通欲織  
流黃迴錦字一番惆悵又成空

九月晦日坐雨示沈敬履

朔風涼雨共蕭然坐對薰鑪手一編黃葉有聲霜後地溼  
雲如夢雁來天江湖歲晚漁樵外關塞秋高鼓角邊河渚  
荻花應更好與君相約釣魚船

晚過石門

溪流曲折繞城根客櫂夷猶過石門小市疎燈沿碧柳平  
橋細雨近黃昏

符之恆字聖幾號南竹仁和人

有秋聲吟藁

詩話南竹年十五從樊榭游過城東皋園得句云寒  
煙樓木未活水齧城根爲時所稱體素清羸卒時年  
止三十  
有三

晚立永興寺前望西溪人家雪山掩映在梅竹中  
山居戀花信逐境無定屬返照歸古寺幽意靜還續小橋  
坐流水平野看行沃炊煙裊前村林影入遠矚似補梅竹  
疏茅茨間幾曲寒雲晚更密濛濛護空綠鐙火接耕廬魚  
蝦生計足卜居他時願結鄰已共囑吾詩盟不忘僧樓寫  
短燭

漁村卽事

村邊輓草浣春泥小雨初晴綠滿溪幾幅斜陽掛魚網人  
家多在柳塘西

查景字士瞻號望齋海甯人有棄餘詩草

詩話望齋幼承庭訓又聞初白查浦之緒論故詩有  
本原壯年游幕四方足跡幾半天下與沈歸愚沈椒  
園盛香巖輩尤稱莫逆是集蓋經諸人論定者陳庭  
松謂望齋於詩無所不覽尤服膺杜蘇兩家所選注

杜詩決擇精當寢饋蘇集發言解意  
能得長公之心惜其書今不傳矣

婺州太守劉漢循別駕董豫周偕余課農游雙龍洞  
歸憩西塢吳氏園卽事

宿雨初晴水滿川課農好趁綠陰天  
官除教養原無事民力耕耘定有年  
北郭煙雲歸石屋西園風景勝花田  
他時若訂林泉約如此溪山擬卜遷

乙酉重九日同人由謳歌嶺登鐘山憩菩提菴分賦  
得七古

銑溪源自馬金落奔作城壕恣噴礮  
鐘山阨險實障之流怒激湍與石搏  
天然形勝冠衢西百里蜿蜒環古郭  
縈紆石徑繞巖阿錯落雲根聳鋒鏑  
時維秋爽景尤清夙約登高肯辭卻  
不多游侶盡同心爭拂衣塵理芒屨  
多情山鳥

叫鉤輶無數巖花散約焯半山亭峻暫支筇已攬長空出  
寥廓相攜賈勇拾級升路轉山迴漸開拓一峯獨壓衆峯  
青八面雖高僅半角金錢牙笏競朝參几案文峯似錐卓  
人攫世網困塵氛快豁雙眸窮縣邈山僧留客餉山穀隨  
意杯盤崇素樸微參道妙少支言不露焚修愈誠慤欲將  
妙筆繪滄洲胸次林泉隨寄託興酣更欲縱清游嘯詠殊  
慙繼康樂

贈西林上人

西林師住西林菴在山不識廬山面昨持齋鉢出山來  
彷彿白蓮社中見自言祝髮從安國元奘世系生同縣旋入  
延恩主法筵重開靈境新禪院半偈語翻千佛塲辦香緣  
結三生善當時知識盡名流過去光陰如掣電爲宏道願

舍叢林桑下已辭三宿戀不招雲侶不把茅一瓢今挂楊  
街堰吾聞師言增太息世出世間遇隨變曾聞莖草化金  
身會見淘沙得精飯檻外青山祇樹深門前流水花溪澗  
西林原不讓東林立地誰堅清淨願社中若繼遠公游選  
勝何如選佛徧

吳均字公三號梅查江都人有青棠館詩集

詩話梅查詩過萬首曾爲歸愚尙書所賞吳澹川贈  
句神似香山句多於玉局篇風流布衣老蕭散地行  
仙看竹時留詠當花不肯眠  
身貧亦何恨詩好萬人傳

陸宣公墓枯柏重青詩以紀事

宣公輔政稱名臣諫諍不憚批逆鱗興元戡難勤贊助轉  
危而安此一人乾坤幾劫滄桑改齊女門東古墳在松楸  
羊虎已銷亡枯柏杈枒數百載聖代深嘉內相貞勅修祠

墓特褒旌精靈耿耿不泯滅香葉勃鬱看重生公能上不  
負天子八利六失標青史卓哉高節何嶙峋正氣貞操長  
不死昔聞柏樹化桐王宴宅又聞柏樹偃起漢帝陵何如  
陸公墓上枯柏復蕃翳雷霆輾戰蛟龍騰柏兮千載耐歲  
寒乃是公之忠義肝柏兮鐵幹挺勁直乃是公之貶死骨  
趙裴遺臭公芬芳小人枉自傾忠良公之丹心炳日月豈  
以柏之榮瘁爲低昂物同人重物亦尊諸葛廟前柏尙存  
他年瞻拜定相識百丈參天看黛色

古鏡篇

雷塘耕夫得古鏡一枚銘云  
大業元年造蓋隋宮鏡也

盈盈一片秋空月雲霧朦朧半邊缺五色雙龍背上蟠銘  
鐫大業何曾滅阿廢當日幸迷樓如花嬌嬪居上頭瓊戶  
晨開金縷鎖珠簾齊上珊瑚鉤明星熒熒寶奩啟競鬪新

妝明鏡裏塗黃那數漢宮嬌寫翠休誇趙女美掃天紅粉  
逞妖嬈豈識春風夢易消故國芳魂歸未得玉鉤斜上長  
蓬蒿綺羅灰劫經千古皓齒明眸何處所微物何爲未化  
塵一朝耕出雷塘土曾懸媚子照嬋娟雨散雲收一惘然  
陳宮難問樂昌事蜀物猶存乾德年好事傳觀勤拂拭繁  
華瞥眼空相憶祇合深宮豔質藏豈期葑屋農人得古訓  
由來戒色荒驕奢淫佚致傾亡當時若以古爲鏡何至楊  
花委路旁

南莊馬秋玉別業

幽深林館枕江潯門外春圍萬柳陰伯仲風流花萼集賓  
朋游賞月泉吟連牀舊雨今誰聽滿閣涼雲供我尋最是  
灘聲易惆悵泠泠猶是寫瑤琴



余京字文圻丹徒人有江干詩鈔

詩話文圻隱於廬市歸愚尚書於焦山見其詩就訪  
定交時監司魏君亦賞異欲其往見不可歸愚謂其  
詩意格俱高詠溫泉云尋常清冷誰相問一熱人間  
便有名題觀碑圖云笑余老去憎文墨愛看人間沒  
字碑猶介之情溢於言表

登金山塔

半空月忽住陡覺下方浮白浪連山走青天入海流塵埃  
吹野馬城郭動蜉蝣極目窮巴蜀風帆萬里愁

碓土索和疊韻

朔風連日吼西郊對酒頻驚屋捲茅異地關河悲客況暮  
年肝膽向貧交住山閉戶論千古坐市垂簾賣六爻耐得  
冰霜存我輩笑看凍蕊放寒梢

東蒼浦

未許閒身卧薜蘿  
風塵青鬢付蹉跎  
故枝近日悲三匝  
好友經旬懶一過  
燕子不來春正冷  
梅花初放雨偏多  
醉鄉新製江南曲  
月夜期君把臂歌

北固木末樓卽事

雁背遙翻落照來  
樓登木末客徘徊  
江山曠劫爭棋局  
鐙火光陰促酒杯  
萬井人煙秋慘澹  
百年戎馬地蒿萊  
西風歸路吹殘醉  
雲掩高城畫角哀

秋杪登清甯道院與漪亭學庵同賦

扶杖登高愴客魂  
西風黃葉滿前村  
林間佳菊能留客  
江上名山總到門  
飯罷楸枰消白晝  
酒闌鐘鼓報黃昏  
暫離城郭無多路  
便覺漁樵地位尊

舟宿

舟宿成吾懶推篷尙擁衾曉煙孤塔失細雨一村深春淺  
餘寒氣人閒見定心家書敗游興不問客浮沈

秋日登銀山別墅同碧江

亭敞北風大高秋氣近冬山寒堅草木江怒鬪蛟龍市遠  
難呼酒崖危欲借筇夕陽看未厭村岸冷雲封

十四夜焦山水晶菴看月

薄暝疎鐘隔樹聞海風收盡嶺頭雲住山夢好經三宿看  
月光圓到九分天淡銀河涵水氣江平冰縠織波紋僧窗  
不用呼鐙火老眼能書白練裙

喬億字慕韓號劍溪寶應人有小獨秀齋詩窺園吟橐  
三晉游草夕秀軒詩鈔惜餘存橐

詩話劍溪爲石林之孫少以詩名從沈歸愚游著說  
詩二編五言取法唐賢寶應諸喬多能詩劍溪之後

推容浦明經亦工五言列白田七子中

過泰山巨上人蘭若得陰字

涼飈肅晴野清磬隔前林古寺行人少寒山落葉深孤筇隨竹影一徑入蘿陰漸覺禪居近空香引道心

嘉禾道中

扁舟入於越回首望句吳草樹裴休宅風煙范蠡湖漁歌爭晚渡桑婦有蠶租舊事滄波逝何人識霸圖

木瀆章重宅曉起從沈尙書放舟至光福鎮

春鶯拂曙嘯春棹落波齊日照萬花谷人行香水溪風光沿岸轉嵐影壓船低泊處非投止聯裾更向西

客氏拜

順治末燕市鬻故書者賣一敝刺大書客氏拜三字邑詩老朱秋厓先生以三錢得之賦

客氏行事載新城公池北偶談今誦先生是詩因拾取贖義效西涯樂府作客氏拜云

客氏拜拜阿誰東廠義兒時乃義兒母何拜爲

客氏拜九千歲晝惟表裏竊國柄夜甘與同寐同寐  
焉用拜

當年客氏拜奉之抵錫賚身殲浣衣局穢氣塞四海運丁  
百六朱明移客氏拜三字在

石鈞字秉綸號遠梅吳縣人監生有清素堂詩集

詩話遠梅詩恪守歸愚宗旨尙有真氣  
當時王西莊王蘭泉阮文達皆稱之

石山棧

關門曉曠矇衆峯遞隱見林根微陽吐水外孤村斷蕭條  
逼仲冬積雪覆山甸山徑石棧危單車緣一綫攀蘿冰墮  
指陟巘風割面羸馬向北嘶游子心未倦回首萬里塗情  
親隔鄉縣及茲道更長飄零一身賤

登六和塔絕頂同宋茗香王柳村

羣山斷江岸一塔凌青冥登臨不知疲寫我萬古情盤紆  
徧憑闌周覽越國形山川勢相逼三折江流清隔江望會  
稽南鎮趨百靈大哉神禹力胼胝安蒼生回頭富春山垂  
釣留客星高臺俯江汜曠代傳清名男兒審出處身重五  
嶽輕浩歌心悲涼雲氣忽縱橫海色含古愁何能見蓬瀛  
但聞邱墓間白楊多悲聲

仲家淺阻雨

昔賢能負米而我獨離親況對孤篷雨因憐萬里身天低  
鴻雁遠江冷菊花新自歎羈棲者年年此問津

焦山

蝸牛廬畔落帆斜山翠龍涎湧浪花到海一拳高士宅夾

江兩岸故人家雲兼鸞鶴來青嶂潮挾魚龍走白沙千載  
焦先如可接欲從此地卧煙霞

山海關望長城

萬山橫一綫迢遞走咸陽遼海臨關盡秦雲抱塞長寒聲  
城上角曉色馬頭霜十載勞生事飄零古戰場

訪錢鶴山

客裏追歡到草堂蕭疎籬菊近重陽開尊白社皆名士繞  
郭青山似故鄉懷抱早甘棲澗壑聲華深悔著文章高城  
日落滄江晚無那孤舟別恨長

疏枝春字玉照號晴墅桐城人諸生有三十六峯草堂

詩鈔

詩話晴墅爲海峯弟子後復師惜  
抱詩力宗盛唐海峯家法然也

吳白巖過訪

湖村微雨過沙岸晚涼生水底墮明月煙中聞鶻聲故人  
載琴鶴深夜訪柴荆把酒茅亭下寥寥蟋蟀鳴

登嘯臺懷海峯夫子

我行白首仍千里襟豁雄風上嘯臺大鳥一鳴衝霧出片  
雲扶月渡江來洛中名士懷前輩魯國諸生愧雋才惆悵  
不逢彭澤宰黃花作意向誰開

同馬魯臣姚根種登孫楚樓

誰知梗斷蓬飄日兄弟同登孫楚樓貧子辭家無善狀殘  
年行路畏逢秋人如河朔風前會舟似山陰雪後游乞取  
青蓮觴詠地寶刀截水足消愁

送許信菴之維揚



歸情已在雁來先一就江程幾日旋翻恨桃花三尺水送人直上廣陵船

方正樹字子雲歙縣人有伴香閣詩集

詩話子雲詩託思清新選辭麗密尤工近體高者不  
城杜樊川劉文房畢秋帆吳會英才集以子雲爲冠  
次及稚存仲則澗如秋塍諸家而以淵如室王采薇  
夫人殿焉乾隆間選刻江浙詩前有秦小峴後有王  
西莊與此爲三皆以十二家爲限云

次山村小店

花開何處但聞香高下崇岡馬足僵山驛  
村新月到門黃菜秧傷蠹因無雨藤實成丹爲受霜  
年少心情最無賴乍離鄉已夢還鄉

潤州懷古

燕子磯邊泊野航感時懷古思茫茫人鋤北府新春草江

走南朝舊夕陽千里斷雲天淺碧一番疏雨柳深黃幾回  
欲學龐公隱傳說長生藥有方

清溪曲

蘭舟如葉蕩春潮又過清溪舊板橋樓外赤闌花外閣銷  
魂涼夜一枝簫

游紫竹林禪院

丁東檐鐸雨初晴雲磴盤空接太清破殿一門吞嶺色小  
亭終古走江聲漁樵來往能行意仙佛虛無易得名石上  
碁殘人散後隔林落日挂銅鉦

獨行

鳥語喜新晴尋花每獨行春煙和野色夜雨變溪聲敢以  
貧爲病翻緣酒得名詩書云有效偏我負生平

東嶺

溪轉忽無際水與遙天合平蕪綠斷處落日紅相接危亭  
碧石闌高低衆峯集巖下秋果落坐看猿爭拾憶昔此夜  
行林凋無留葉白沙湖上路紅鐙嶺頭塔舉杖叩院門幽  
響空山答

過天福寺

落日沈江破水痕石梯百級鑿崖根空山雲與人爭路破  
寺風隨虎打門畫壁丹青塵漠漠庭墀松檜雨昏昏支公  
鷹馬眞神駿此意何人可細論

登永濟寺樓書懷

危樓突兀貼蒼山捲幔三吳一望間林鳥忽隨霜葉下江  
潮自背夕陽還有涯歲月含愁過無用文章割愛刪憑眺

可憐情作惡蒲團深羨老僧閒

九日過某友山居

我懶登高沿俗例君逢佳節閉門居竹陰連磴宜添鶴山  
影沈溪不礙魚詩續催租人去後菊開送酒客來初晴窗  
對坐徵餽字藤紙零星各競書

鎮海樓次亦雲韻

危闌獨倚動愁顏突兀高樓霄漢間急水與天爭入海亂  
雲隨日共沈山未知婚嫁何時畢安得帆檣自此還煙樹  
憐人頻望遠一叢東北隱鄉關

超果寺

斜門通小徑竹影綠于雲千嶂一亭得孤花羣蝶分風飄  
金鐸韻苔繡石碑文饒有尋秋興林端又夕曛

一樹

一樹紅桃覆院門臨階坐酌玉崑崙不知花影橫襟上猶

認紅榭舊酒痕

羅聘字遐夫號兩峯江都人有朱草詩林香葉草堂集

王蘭泉曰兩峯爲金壽門弟子能畫生有異稟目見鬼物有所遇輒寫以長卷久之成鬼趣圖殊形異狀宛然吳道子地獄變相又如讀五王樓炭經也其寫大阿羅漢及摩訶薩各像足與崔青蚓陳章侯上下又能詩好游山精通佛理撰起行錄釋禪淨兩家之惑索予序之游京師最久垂老歸揚州僅存登岱詩

卷二

詩話兩峯畫不獨興趣圖擅奇致胎息古法自出清新可稱精詣妻方白蓮畫亦逸品煙墨和莊洵高士也詩境清鏡斐亶非尋常畫師題詠可比

雨中復上岱宗遇聶二 欽 歸簡朱大 質

夜雨侵客枕山雲宿官閣起聽新瀑聲遙從空澗落因思

凌辱顏飄然出城郭抱癖憐寡諧不憚溼芒屨陟厯忽逢  
君笑謂似宿諾相與事躋攀一一恣搜索東崖疊壁壘西  
嶺攢劍鐔矚目千夫容雲中辨隱約萬松爲笙竽寒風噫  
崖崿盤迴走玉龍聯絡垂珠箔大聲吼波濤小聲擊鈴鐸  
石凹水凝砮笠斜風欺箬墨雲看屢翻雷雨復交作飛來  
澗底龍噴灑徧林壑歸輿時恐傾磴滑難停腳未免俗士  
譏亦任山鬼詭靜悟造物心所忌在極樂不知雨更佳茲  
游足凌轢況有未來人尙爲塵事縛

御幃坪

宋眞宗  
駐蹕處

橋平便游屐赤闌無巧斲窺磻俯亂流面壁仰飛瀑或如  
雪作花或如几鋪玉或如大小珠倒傾千萬斛山靈慰勞  
人娛耳復娛目淹留坐陰磴不獨洗煩溽因歎祥符初繁

華逝水速玉輅載天書萬乘來空谷辛苦獻芝人於焉開  
御幄遺跡問清流高松聲謾謾

方薰字蘭坻號樗盦浙江石門人有山靜居橐

詩話蘭坻以畫名山水花卉皆能擅勝  
詩清而腴阮文達謂有大歷十子遺意

重過吳氏林亭

踏莎溼雨屨乃知露未晞俛行見我影林罅來朝暉暫祛  
塵塋緣復款煙蘿屏雲構緬遺躅喬木陰成圍潛鱗暝欲  
上蟄燕時還飛悠哉感物性及此見化機宗游仍晝寢任  
釣空苔磯斯人已寂寞風雅其安歸

僧廬古柏

遮檐黛色青濛濛攬拏有物如乖龍撐庭老柏枝幹古頑  
苔剝蝕窪其中冰霜飽飫閱歲代元氣不伐煩神功荒陬

獨立空羣木山僧因樹爲茅屋歷劫多看桃杏紅深陰長  
覆袈裟綠日暮踏枝病鶴來柏子細落青成堆迴颺起簾  
流梵唄洵月倒影橫香臺高柯向人意偃蹇頗似失地形  
低徊詎知造物非厚爾匠石拂拭孤根摧我歌殷勤一相  
慰莫如櫟櫟全爾材

東湖卽景

張家林亭杉葉遮李公橋外柳絲斜不知九派東湖水流  
出春城幾處花

陳二西招同淥飲泛湖至南山而還

隨意游船泊水隈漪園深處柳煙閑人從荷氣蘋香去鳥  
向山光樹影來抱杖尙遲蒼蘚路晚鐘催下夕陽臺琉璃  
萬頃浮歸艇此樂平生第幾回



顏魯公銅印歌

鮑髯老眼海月明勘書燭古無遜情手磨銅章是唐製瘦  
蛟貫紐鏗有聲土花蒼寒周四角篆勒玉筋文眞卿當公  
出守遭時變賊噪平原擊鼓震車書如火上蠟丸夏雲無  
光照銀印此非官印用必常勢欲從公與城殉得全一郡  
甯非天白頭再見中興年摩崖碑中印合縫乞米帖後鈐  
餘牋平生忠信憑遺物千載劫灰不磨滅子孫失守鬼神  
護豈獨老髯深愛惜當時不容公亦得不死盧杞死希烈  
靴中幾作臨淮刀懷內何慚太尉笏印乎印乎無口說飲  
鴈踏火完公節

蔣仁字山堂仁和人

詩話山堂自號吉羅居士善書工篆  
刻爲浙派七家之一詩亦清雅拔俗

阿育王山放光松次錢少詹辛楣韻

華蓋蚪松似幢幢翠掃肩毫光舍利現劫火石鱗堅玩世  
經梁宋蟠雲霽梵天直愁騰化去神物二千年

山閣雨中喜邵四右菴至卽送晚晴山長還山陰疊  
涪翁仁亭詩韻

昏沈湖上雨舒卷雲中山雲山抱城走傑閣凌朝寒笠屐  
天際落古道君一斑不憚峻嶺滑送客吳越關行衣盡嵐  
氣笑語倚危欄相於歲晏裏聽雨圍爐閒俄頃雨聲止霽  
色明江端賀監從此去中流應仰觀

丙午十二月五日雨中答邵四右菴喜予至三用涪  
翁仁亭詩韻

賀監峭帆去余亦歸苒山回睇萬松嶺雲霧靈高寒君家

好兄弟文采蔚豹斑不見數十日遲我風雨關執手道近  
狀鳴瀑飛檐欄小樓日高卧翰墨有餘閒折梅懷陸凱謂紹  
之當筵贈蘇端窮達貴適意其餘曷足觀

奚岡字純章號鐵生錢塘人有冬花盦燼餘橐

詩話鐵生自號蒙泉外史工山水高及倪雲林下亦不失李檀園不肯輕爲人作晚遭家難旬日中喪其弟及三子一女家復燬於火又遭母喪服終抑鬱以卒詩清冷絕俗肖其爲人

游寶石山

我登寶石山山瘦削寒碧巍然翠堵坡天半卓孤立迴茲  
盪空林霜葉鳴策策側步怯危梯逼面起蒼石賞奇心固  
幽造極境忽闢屬目送飛鴻煙江一痕隔冉冉空中雲轉  
瞬已無跡浮生正如斯胡爲苦行役不若來山中優游愜  
所適醉卧蒼松根不知煙磬夕

陳春渠先生過冬花庵話舊

載酒紅橋賦柳枝  
十年回首不堪思  
圖書已散江淹宅  
荷芰應荒山簡池  
往事孤雲無定跡  
舊交寒竹有眞姿  
知君老去情多感  
不敢臨風誦此詩

同余慈柏徐秋雪湯點山游韜光

老衲石林跡  
詩禪直到今  
亂泉雙澗落  
修竹四山陰  
出世消塵劫  
頻過長道心  
同儕多勝概  
吾獨悵幽襟

湖上晚歸

晚來湖上景  
渾似雨中看  
雲氣沈山黑  
煙痕帶水寬  
聲清知寺近  
鐙遠到城難  
蕩漾憑舟子  
孤吟吾自安

朱方藹字吉人桐鄉人貢生有春橋草堂詩集

同沈樸翁姚蕙田沈積山諸先生含叔七兄登南屏

詣壑菴觀磨崖隸書家人卦傍晚泛湖而歸

夙昔抱微尚溪山嗜幽討況茲風日佳招攜得朋好芒屨  
蹋白雲人影亂芳草夾道繁荆榛到門蔭松篠略約自逶  
迤清泉一泓繞何年巒翠中鑿此金魚沼閭黎揖迎賓骨  
相清且老坐我青豆房淨域塵不擾石鼎煮新茶山廚飯  
香稻乘興入巖洞繚曲景幽窅須臾緣磴上如行衆樹杪  
快觀磨崖碑筆勢最天矯云是涑水書前輩每稽考歲久  
苔蘚侵拂拭勞手爪悔不響搨歸裝潢成墨寶斜陽聞寺  
鐘出谷循故道鼓棹向中流舟輕疾于鳥煙水何濛濛雲  
峯殊杳杳回首望南屏斷塔挂林表

曉登靈巖

曉間靈巖鐘遂入靈巖路石磴轉百盤山花泣春露白雲

與空翠蒼茫色交互須臾旭日升禪關散輕霧井歇銀牀  
鳴廊絕香屨步何須問遺蹤繁華久非故凌空一縱目好  
景悉奔赴點點太湖帆重重茂苑樹金閨十萬家朝靄迷  
濛處望欲盡句吳更上琴臺去

同王蘭泉張少華曹來殷遂初園看梅信宿作歌呈  
拙菴吳丈

靈巖山勢何崔嵬越來溪水相潏洄山崖轉處樵路斷草  
堂恰對溪光開入門襟袖襲芳氣修途一徑循蘭陔晴空  
點點落香雪移來千樹西山梅臨池一株更奇絕淨查橫  
卧黏枯苔形勢定爲百年物霜皮鐵榦知誰栽山家位置  
見真率雜以桃李杉楓槐交柯接葉互相映花光隱現明  
珠胎先生六十氣尙孩手攜鴉觜芟蒿萊古貌古心兩相

似清風颯颯飄于鬢預遣平頭設枕簟頻招上客傾樽疊  
花前列座鬪韻語催詩更進流霞杯輞川舊游有傳刻可  
無高詠追王裴當筵授簡忽自失松聲萬壑何悠哉

揚子江曉發

殘星墮江底落月照江畔荒村雞乍號空林鴉未散舟師  
貪利涉鼓楫中流半杳杳金山鐘濛濛瓜步岸漁人隔煙  
語估客停橈飯沙頭兩睡禽比翼失清旦風波豈殊途勞  
逸各已判行役何時休撫景發長歎

度鉛山嶺

嶺上復成嶺雲煙近舄生危崖懸樹暗斷壁瀉泉清路繞  
林端出人穿石罅行山中春樹早二月已聞鶯

西方菴

緣崖折而下鳥道似鑿空茲來本游遨反抱失足恐二分  
垂其外一步一神悚幸有木扶闌不知滑雙踵徑盡得平  
嵐筠松四圍拱數椽青豆房綠曲類巖洞屋後挺一峯拔  
地千丈聳喬松生其巔蟠根少培壅居然厯歲千翠蓋自  
鬱蒼同行詫異見狂叫興飛動山僧解留賓茗椀殷勤奉  
聊坐息我勞去路還賈勇

冬日同汪比部對琴金博士棕亭閣上舍玉井汪水  
部秀峯汪學正劍潭何文學春渚吳庶常穀人紅  
橋讌集

殘蘆衰柳遍江潭蕭瑟偏宜我輩探風裏浮雲自西北尊  
前名士盡東南白鷗眠處船齊泊紅蠟燒時酒半酣珍重  
今宵良讌會渭城莫漫唱何戡



葛嶺

言訪神仙宅攀藤石磴閒泉聲春雨澗人影夕陽山丹竈  
久岑寂白雲空往還勞勞塵土夢愧我幾時閒

送惠定宇徵君之揚州

西風颯颯吹楓楠新霜點點飛江潭柳條零落不忍折朝  
來錄別嗟何堪江淮都轉尙風雅蓮花幕底朋盍簪況逢  
江東老名宿促行那許停吳驂先生榮顯非所慕每於典  
籍偏沈酣禮樂甘從野人野著述直似貪夫貪媧笙義瑟  
辨律呂羸灰孔壁勤稽參五經紛紛綸抽腹笥百家肴核窺  
塵函漢京賈鄭不可作淺儒俗學爭嘲吟鉅製皇皇振聾  
聵洪鐘大簾聲非龔君家兩世列清禁石渠天祿書曾探  
趨庭授受有經說統同辨異功最覃蕭山秀水二公出鼎

鎬分足應成三先生一編紹舊業門題通德眞無慙平生  
汲古亦有志故紙不厭搜枯蟬梁邱家宗我已識每思執  
卷耽高談惆悵相逢復相別當筵離曲歌何截幾時棲息  
衡宇下萬軸坐擁藏書龕著錄不少稱弟子學術正好傳  
孫男碧草盈庭春盎盎紅豆著樹花鬢鬢登堂儻許問章  
句便思買宅香溪南

鮑倚雲字薇省號退餘歛縣人優貢有壽藤齋詩集

詩話退餘篤學工詩年四十絕意進取教授於鄉嘗  
入閩學使者幕校閱勤瘁攬疾歸詩清微雅健獨抒  
性情讀者可想見其高致

黃山古松歌應潘大中丞教

軒轅施手開鴻濛削起六六青芙蓉奇秀半緣松與石裂  
石詭出成古松千株萬株不藉土人代渺歷超秦封靈區

幽絕幾人到到者驚叫誇神工路指天門兩翁揖一迎一  
送分西東經互雙壁勢蜿蜒文殊道上眠蒼龍髯張角嶄  
卧將起疑潛疑現風雲從峯登始信劃中斷下臨絕壑危  
橋通枝生彼岸橫此許殷勤引臂扶游蹤游人見松不見  
幹松名破石穿玲瓏環抱有若母懷子爭奇倒挂蓮花峰  
倒挂蒼虬髮上指一絲壁竇長青蔥離奇更說蒲團好輭  
鋪密織雲千重何當一佛分一具諸天花雨飛晴空高不  
盈尺圍數丈佳處略與棋枰同棋枰松在平天杠松鬣井  
井橫兼縱頂平若砥枝若野仙家一局何時終就中奇絕  
推擾龍一峯突兀千峰中松與峯鬬峰腹坼猿鳥何敢攖  
其鋒盤拏鬱積怒未已左枝橫曳蒼煙籠拖嵐抹翠數峰  
遠飄搖柳綫青茸茸精華終古日霜結諸峰八面來朝宗

得非神仙恣狡獪鑄鑿造化天無功天公凝睇人生妬破  
石先見雷火紅蒲團颺去龍夜逝丁丁樵斧來悲風吁嗟  
神物半失護識者感歎心慙慙我生山中未見山幽探徐  
擬策短筇山圖記載百不一奇姿瓌狀難形容藤絡莎被  
徧崖谷一松抵一仙人逢黃山靈氣不可盡翎茵鐵幹綿  
春冬

蘭語篇

幽芳不知春春赴桃蹊水迴波憶舊雨冥濛曉煙裏疇昔  
子慕予窈窕竟奚似目成山之南清川淥如此蕭蕭秋雨  
惡簷端孕花蕊酷臘釀奇寒土乾未滋螳引領期入房吹  
衣北風起根墮暗已朽處堂昧生理怨長交不終媒勞復  
誰倚醺酒與花盟花光去若駛蓀兮獨自愁何人信予美

祭詩行

我聞祭詩之例賈島開時當除夕陳樽疊命意還應自勞  
苦亦或艱辛歷歷如有神助靈之來才人抑塞磊落不得  
志拔劍斫地歌空哀春風不煦麻衣業何如此夕凍釀傾  
瀉三千杯一杯酌詩復一揖絕倒可免襟顏推憶昔先子  
授詩我五歲明年就傅聳雙髻課經暇覆杜陵律舞勺偷  
齠蘭臺藝漁村先生浙中耆朱竹垞查悔餘老輩舊聯袂  
詩評詩札什襲藏討盡淵源辨根蒂嗟我貧兒不識萬卷  
開書城風雲月露揮毫輕玉堂老人東臯伯父顧之浩然歎問  
我試嘯英物如何英而不思吹龍笛與鳳笙快劍入海屠  
長鯨爲我擲地作石聲何爲效此蚓泣蒼蠅鳴積數百篇  
悉焚棄更歷憂患成孤生到今垂老得詩二千三百五十

有餘首刺促不減酸寒情當年老輩大雅不可作豈獨中  
選博學鴻詞了無作下第諸公峙壇坫接武名賢輝館閣  
宿將不盡閫內知餘軍亦勝今人弱安得九原呼起坐上  
坐令我低頭就繩削人生富貴由天公何須較量達與窮  
我不能學春城無處不飛花之韓翃亦無才擬小樓一夜  
聽春雨之放翁端居聖明恥舟楫孟六豈是南山農枉將  
苦句激天子月影歸抱窗虛松浪仙亦坐傲峭累有眼不  
識人中龍蹉跎聊復成進士可憐聲名十惡不爲詩家宗  
肥瘦何關冰雪胸筆陣乃當韓豪衝羨煞騎驢坐得推敲  
偶交游贈答相望不隔潮州蹤我詩非寒亦非瘦方干羅  
隱門庭陋鞭絲誰與九州橫腹笥殊慙四庫富賞音也自  
播雲處病骨無由脫巖岫草間未稟虎鳳姿野外難爲金

石奏就中涕淚紛千行骨韻莫論宋與唐好與子孫識面  
目先人遺緒留取千春長小巢壺詩篋裏香先君遺集四世傳  
看古錦囊今夕何夕醉酒漿燭花高吐騰詞銚餘生尙得  
餘音鏘二十四卷之外文瀾猶茫茫

於震字亦川丹陽人武生有亦川詩鈔

王柳村曰亦川負才任俠坎軻終身藝苑借之所爲詩雄秀沈鬱得力士少陵詩話丹徒冷士唱余京鮑皋金壇播高高炳燦陽彭桂及亦川號七布衣皆以詩傳亦川出身武庠尤爲表異其詩氣韻沈雄而無粗豪亢厲之習教士所不及也

讀少陵孤雁詩

朔風吹廣漠古塞一星橫湖海憐形影風霜隔弟兄蒹葭  
連十月礎杵逼三更倍歷淒淒意甯堪老此生

別朱如川

家事不復道酒闌花滿林一劍曉初發孤帆春已深雲霄  
吾輩事門戶百年心夢醒練塘月匡牀照布衾

新燕

池塘雨過夕陽斜又見銜泥掠淺沙歲歲飄零偏識主年  
年辛苦爲無家閑門社日仍芳草舊巷春風半落花好待  
將雛新壘就飛飛一任到天涯